

Inatsisartut suleriaasianni §§ 33 naapertorlugu aalajangiiffigisassatut siunnersuut imaattoq matumuuna saqqummiuppara:

Imarsiornerup isumannaatsuunissaa pillugu inatsisit allannguutaasa Kalaallit Nunaannut atuutilersinnerinut peqqussummut Namminersorlutik Oqartussat oqaaseqaatissaat pillugu Inatsisartut aalajangiiffigisassaattut siunnersuut
(Ineqarnermut, Attaveqarnermut Angallannernullu Naalakkersuisoq)

Kalaallit Nunaani imaq avatangiiserput pinngitsoorsinnaanngilarput. Tassangaanniit aningaasarsiorfigut pingaarnerit pissarsiarisarpavut, avataaniit uatsinnut pilersuutigineqartut amerlanersaat imaatigut tikiunneqartarput, aammalu imaatigoorluta angalaaartarpugut. Taamaattumik aamma imarsiornerup isumannaatsuunissaanik aallussiuarnissarput pingaaruteqarpoq, tamannalu aamma Namminersorlutik Oqartussat imarsiornerup isumannaatsuunissaa pillugu qaammarsaanermik ingerlatsiuarneranut pissutaavoq. Radiukkut TV-kkullu saqqummiussat aqutigalugit Kalaallit Nunaata imartaani angalatilluta pitsaasumik isumannaatsumillu pissusilersortarnissarput aallupparput. Qaammarsaanerli kisimi naammanngilaq. Tamanna pissutigalugu siunnersuut manna, imarsiornerup isumannaatsuunissaa pillugu inatsimmi allannguutinik kingullernik Kalaallit Nunaannut atuutsilersifiususaaq saqqummiunneqarpoq.

Rigsombudip Imarsiornermut Aqutsisoqarfik sinnerlugu Imarsiornerup isumannaatsuunissaa pillugu inatsisit allannguutaasa Kalaallit Nunaannut atuutilersinnerinut peqqussut nassiuppaa. Peqqussummi imarsiornerup isumannaatsuunissaa pillugu inatsimmi allannguutit kingulliit tallimat Kalaallit Nunaannut atuuttussanngortinneqassapput.

Peqqussut ilaliussatut ilanngunneqartoq allannguutissatut siunnersuutinik arlalinnik imaqarpoq. Kalaallit Nunaannut immikkut soqutiginaatilittut marluk taaneqassapput.

1. § 24. Inatsit inatsisitigut tunngavissatut aalajangersakkanik ataasiakkaanik imaqarpoq, tassanilu pingaartumik aalisariutini isumannaallisaanerup nukittorsarneqarnissaa siunnerfigineqarpoq, tassunga aalisariutinik misissuinermi akiliisarnermut maleruagassanut allannguutit, piffissani aalajangersimasuni atuisut akiliuteqarfigisaannik aalisariutinik misissuisarnermut inatsisitigut tunngaviliisut ilaatinneqarlutik. Tamanna inuussutissarsiornermi aningaasartuuteqarnerulernermik nassataqarsinnaavoq, kisiannili erseqqissaatigissallugu pingaaruteqarpoq, allannguutit taamaattut atuutsinneqalissappata, tamanna Namminersorlutik Oqartussat aamma Imarsiornermut Aqutsisoqarfiup suleqatigiinnerisigut pisussaammat.

2. § 29a. Kalaallit Nunaata imartaani danskit imartaanni angalasarnermut sanilliullugu imigassartorsimalluni angalasarnermut maleruagassanik sukannernerusunik atuutsitsilernissamat periarfissaqalerpoq. Inatsimmi allaffissornikkut Kalaallit Nunaata imartaani imigassartorsimalluni angalasarneq pillugu sukannernerusunik maleruagassiorsinnaaneq inatsisitigut tunngavilerneqarpoq. Tassalu aammattaq angallatit sunngiffimmi atorneqartartut, angissusiat apeqqutaatinnagu, promillemut killissarititaasunut aalajangersimasunut pineqartunut ilaatinneqarnissaat pillugu

maleruagassiortoqarsinnaalissaaq; taamatullu promillemut killissarititaasut inunnut, angallammi, Kalaallit Nunaata imartaani angalasumi issimasunut tamanut atuutinneqarnissaat aalajangersarneqarsinnaalissaaq. Maleruagassat Namminersorlutik Oqartussat aammalu naalagaaffimmi oqartussaasut attuumassutillit, taakkunungalugu Kalaallit Nunaanni Politimesteri ilaalluni, akornanni oqaloqatigeereernikkut aalajangersarneqassapput.

Peqqussutissatut siunnersuut nassiunneqartoq Naalakkersuisut ersarissumik pitsannguutaasussatut isigaat, aammalu promillemut killissarititat aammattaaq angallatinut sunngiffimmi atorineqartartunut atuutinneqalersussanngorlugit aalajangersarneqarnissaannut inatsisitigut tunngavissaqartoqarnera nuannaarutigalugu. Imigassartorsimalluni angalasarnermut maleruagassat 2008-mi Kalaallit Nunaannut atuutinneqalermata, tamanna taamanikkut Naalakkersuisuusunit annertuumik kissaatigineqarsimavoq, tamatumalu kingorna tamannarpiaq pillugu inatsisip allanngortinneqarnissaa sulissutigineqarpoq.

Peqqussut Imarsiornermut Ataatsimiititaliamut, Peqqissutsimut Naalakkersuisoqarfimmu, Aalisarnermut, Piniarnermut Nunalerinermullu Naalakkersuisoqarfimmu, Aningaasaqarnermut Naalakkersuisoqarfimmu, Ineqarnermut, Attaveqarnermut Angallanermullu Naalakkersuisoqarfimmu aammalu kommuninut tusarniaassutigineqarpoq. Tamanna peqqussummik allannguinnissamut tunngavissiinnigilaq, taamaallaat aaqquissuusaanikkut allannguutinik annikitsunik nassataqarluni. Kisiannili aalisariutit piffissani aalajangersimasuni atuisut akiligaannik misissorneqartalernissaasa atuutinneqalernera inuussutissarsiuteqartut aningaasartuutaasa amerlinerinik kinguneqarsinnaasoq oqaatigineqarpoq. Tamatumunnga tunngatillugu erseqqissaatigineqassaaq, peqqussummi aalisariutit piffissani aalajangersimasuni atuisut akiligaannik misissorneqartalernissaat periarfissiissutigineqarmat, tassanilu aalisartut isumannaassusaasa annertusitinneqarnissaa siunertarineqarpoq. Aaqquissuussinerup aalisariutinut kalaallinit pigineqartunut atuutinneqalernissaanut, tamatumalu qanoq annertutigisumik pinissaanut Namminersorlutik Oqartussat aamma Imarsiornermut Aqutsisoqarfiup akunnerminni isumaqatiginninniarnarat apeqqutaassaaq. Peqqussut imminermini aalisarnermik inuussutissarsiuteqarnermi aningaasartuuteqarnerulernerinik nassataqassanngilaq.

Tamanna tunngavigalugu Naalakkersuisut inassutigaat, Imarsiornerup isumannaatsuunissaa pillugu inatsisit allannguutaasa Kalaallit Nunaannut atuutilersinnerinut peqqussutissatut siunnersuutip ilusissaatut siunnersuutigineqartoq Namminersorlutik Oqartussat tapersersinnaagaat Imarsiornermut Aqutsisoqarfimmu nalunaarutigineqassasoq.

Taamatut oqaaseqarlunga siunnersuut Inatsisartuni kajumittumik suliarineqartussanngorlugi tunniuppara.